

«Faschai il sigl en l'aua freida»

Politicras giuvnas han fatg curaschi a las demonstrantas da candidar per gremis politics

■ (anr/vi) Pli che 300 dunnas èn sa participadas il glindesdi a la demonstraziun a Cuira. Curdà si è che dunnas da tuttas regiuns grischunas èn vegnidas en la chapitala per mussar ch'ellas èn malcontentas. Igl è stà in til plitost paschavel ch'è i da la via da la staziun siadora e sunter tras la via da la posta. Pir en las giassas da la citad veglia èn las Grischunas vegnidas ord la crosta ed han fatg canera, schulà e protestà. Las giassas han rebattì ils cloms e schuls da gritta.

Sulet 23 da 208 vischnancas han ina presidenta

Al plaz da la regenza ha cussegliera guvernativa *Eveline Widmer-Schlumpf* beneventà las demonstrantas. Ella partia il malesser da las dunnas, ha Widmer ditg. Era ella saja inquietada. Sco gimnasiasta saja il cudesch dad Iris von Rother «Frauen im Laufgitter» stà in da ses cudeschs preferids. Dacurt haja ella chattà in auter cudesch, ch'ella haja era legì da giuvna, sin la maisa da notg da ses figl: Il diari dad Anne Frank. Ina passascha da quest cudesch ha Widmer prelegì. Anne Frank descriva la situaziun da las dunnas il 1944. I fetschia surstar che la malgiustia che Frank descriva, è anc oz la medema. Perquai ha Widmer remartgà: «I dovra anc bler temp fin che l'egualità n'è nagin tema pli.»

Widmer fa attent che sulet 23 da las pli che 200 vischnancas grischunas vegnian presidiadas da dunnas. Ella pledescha persuenter che las dunnas duain era daventar pli tolerantas visavi differents musters da viver.

Nagut cun vons da boxen

Dus votums originals han *Lionella Zanolari* e *Katharina von Salis* purschì sin il plaz da la regenza. Zanolari ha candidà l'atun passà per il cussegl nazional. La giuvna politicra ha raquintà ch'ella na haja betg dastgà posar sin la fotografia da candidatura cun vons da boxen.



«Duonna piglia piazza!» ... sin ils sezs dal cussegl federal ed en las pultrunas da direcziun.

FOTO C. CADRUVI

Quai na haja betg correspundì al maletg da dunnas da sia partida.

Tuttina è Zanolari inchantada dal cumbat electoral. Ella appellescha che dunnas duain candidar per uffizis politics, era sche quai muntia in sigl en l'aua freida. Il sigl en l'aua freida saja stà la meglra experienscha ch'ella haja fatg fin uss.

Chalar da parturir

Von Salis che tutga tar la generaziun veglia ha ironisà la isteria da spargn che regia da preschent: Insumma possian las dunnas gist chalar da parturir, ha Salis manegià. Uschia possian ins spargnar l'entira assicuranza da maternità. Ins possia spargnar en tuttas scolettas. I na dovri alura era naginas scolas pli, naginas canortas, naginas scol'autas etc. I saja bler pli bunmartgà d'importar

glied giuvna, bainscolada, da l'exteriur. Von Salis n'ha dentant betg pudì dir, sche questas propostas plaschessan era gist a quella partida che ha mess en rocla l'entira isteria da spargnar.

Bler applaus per Meyer

La saira ha il program cuntinuà en la sala dals «Trais Retgs». Avant ina sala bain plaina han quatter dunnas discutà intginas tesas dal manifest da dunnas (guarda fanestra).

La deputada *Celia Meyer* ha raccoltà bler applaus per sia moda nuncumpli-tgada da politisar. I saja impurtant da candidar per scharschas autas, ha ella ditg. Sezza ha ella gia duas giadas empruvà da vegnir en il cussegl da banca – ina bastiun dad umens. Ils deputads n'han fin uss betg elegì ella, ma ella candideschia tuttina vinavant, ina terza ed

ina quarta giada. Meyer è mamma e gudogna sezza ses paun da mintgadi. Ella saja bunamain per schabetg vegnida sin ina glista il 1997 ed eria «schoccada» cura ch'ella saja propi vegnida elegida en il cussegl grond.

Quotas da dunnas en l'economia?

Ina tut altra biografia ha *Brigit Pedolin* che maina sia atgna fatschenta e s'engascha en associaziuns da dunnas da fatschenta. Tar las quotas di ella: Ella n'haja pli baud betg gi simpatia per quotas. Sch'ella vesia dentant, quant ditg ch'i giaja fin che las dunnas vegnian acceptadas, pudess ella s'imaginar d'introducì per diesch onns quotas da dunnas. Il chantun avess era influenza sin l'economia, sch'el dess be pli lavur a firmas che resguardan ina tscherta quota da dunnas en cussegls d'administraziun.

Katharina von Salis ha menziunà en quel connex ch'ella saja sezza stada ina dunna da quotas en ina cumissiun a l'ETH. Da quai na stoppian ins betg sa turpegiar. Anzi, ella haja uschia gi la pussaivladad da proponer anc autras dunnas en la cumissiun. Entaifer paucs onns haja quai gi tuttina bleras dunnas sco umens en sia cumissiun.

Il di da dunnas è vegnì organisà da la Centrala da dunnas, dal Plenum da dunnas e dal Moviment ecumen da dunnas. A la fin hai dà in concert dad *Orna Ralston* en il «Trais Retgs».

Il manifest da dunnas dal Grischun

Trais organisaziuns da dunnas han concepì in manifest da dunnas dal Grischun. Ina resumaziun:

Nus ans dustain...

- cunter las mesiras da spargn unilateralas dal chantun (chasa da dunnas, cussegliaziun giuridica da dunnas, spital Fontana ed autras ginecologias)

Nus pretendain...

- dapli dunnas en las cumissiuns
- dapli plazzas parzialas
- ina tabla da votaziun electronica en il cussegl grond per vesair tgenins deputads e tge deputadas che represchantan ils interess da dunnas
- che l'egualità vegnia prida si sco rom d'instrucziun a la scola auta pedagogica, al gimnasi ed a las scolas professunalas.

Per quest manifest pon ins rimnar sutscriptziuns anc l'entir mais. Ins po retrair il manifest tar: Plenum grischun da dunnas, chaum postal, Cuira, www.frauenplenum.ch / Centrala da dunnas, Gürtelstrasse 24, Cuira / Ökumenische Frauenbewegung, Chaum postal, Cuira.